

武邑縣志卷二

營建志

觀泉揆日辨方正位建置之典由來尚矣武邑壤接京圻承平日久百舉粗備自狐承陸梁半成焦土邇年城郭祠廟漸還舊觀而廨舍未復深念瘡痍待蘇奚忍重殫民力謹詳規制用俟將來志營建

城池

武邑原係土城正統十四年知縣張贊重築成化三年知縣楊琇重修成化十三年知縣馬昭繼修宏治十四年淳

沱河漲城壞正德元年知縣成文重修建樓櫓嘉靖二

十一年知縣魏廷重修邑人徐璉記

武邑古燕趙境後隸恒山信都城池初建

莫詳其始考周官之制先王體國經野有掌固掌修城郭溝池樹渠之固易云王公設險以守國是知國保於民民保於城而守內攘外之具弗可闕焉邑舊有城卑隘正德戊辰山陰都憲成公文爲令時曾加修築齊東張尹岳繼修迄今歲久傾圯捍衛無所倚嘉靖壬寅秋河中魏侯奉上命來主是邑時舊政盡敝民習刁僞侯以博學雄才討謨遠識敷政嚴明邑之黠者奸者咸斂戢而日範於軌易慝以良回薄以敦廢墜悉檢而更張之由是令譽丕著累膺旌獎暇日視城池坍塌欲加修葺適撫憲以比歲邊圉孔棘檄郡縣修城爲備侯曰城池民之衛也保障令之職也遂鳩工庀材以畢斯役其營度也周其編役也均其委任也良其賞罰也公凡所需侯獨處而力任之是以財不妄靡民不告勞幾數月厥功底成仰見高塘堅厚周廻四里有奇雉堞嚴密池堤深濶四門有樓伉遂壯麗門東曰

寅賓西曰寅饒南曰迎薰北曰迎恩城隅各構一樓舖舍
十有六外郭築垣設門防範益密斯城也規模制度煥乎
維新隱然爲右輔雄鎮足以祛內寇攘掠之患弭外夸窺
伺之心俾吾民仰事俯育坐享安養生全之樂大矣哉侯
之惠也雖然抑有聞焉昔誠齋云人自爲守者守不以城
人自爲戰者戰不以兵守不以城以人爲城也戰不以兵
以人爲兵也信斯言也地利者守邦之要人和者保邦之
本務本圖要不歸諸賢侯之功而孰歸落成之日邑人籍
籍交頌璉同監生王崇華邑博崔君王君郭君暨闔學士
夫謀欲鐫石紀侯功德庸垂不朽衆皆忻贊其成仍屬文
於璉遂敘其事以爲記庶幾宰此邑者鑒其難成而虞其
易敗接武修葺是又邑民之永賴也侯諱廷字子揚號三
巖鄉進士善政多端難以盡書萬歷十四年知縣王學易
一石之立亦嗣峴山之遺意爾

重修至

國朝順治間少爲補葺咸豐七年知縣陸時言重修邑人李

冠羣記

自古建國之制城郭爲先非徒壯觀瞻實資保障也昔顏真卿守平原增陴濬隍以備不虞厥後祿

山反河朔盡陷惟平原存沈璞爲盱眙太守繕城浚池爲防禦計及魏兵南向郡邑覆沒而璞城以有備無患古人時際承平猶且安不忘危思患預防况干戈擾攘之秋迭遭蹂躪可無成前車之覆而爲善後之圖乎觀津城未知叛建何時明正德戊辰邑侯成公會加修築張公繼之嘉靖壬寅魏公因舊制而高大之壙峻隍深周迴四里有奇四門依舊規制宏厥屹然爲畿輔雄鎮厥後年久漸就傾圯然幸際太平目不覩旌旗耳不聞金鼓相與習而忘之迨髮逆肆擾以來近畿烽火頻仍同治元年宋逆竄擾畿南二年正月長驅直入城闕不守焚掠殺傷縣署廨舍皆爲灰燼寇退之後瘡痍未復至八月邑城復陷時流離倉皇艱險萬狀痛定思痛殊難回首未嘗不歎城垣廢弛之禍至於此極也自時厥後屢議增修輒以經費艱鉅寢甲子秋陸邑侯來莅茲土甫下車卽有增修之志居無何馬賊甫平捻匪又起七年二月竄踞滏河西岸去城僅十餘里闔邑驚恐未幾賊氛漸遠邑侯乃屬紳耆而告之曰時

方多故我武地勢平衍無山河爲表裏而士瘠民貧又無
礪堡壁壘以備緩急不及此增修城垣爲守禦計一旦有
警數萬生靈將何恃而不恐時有以工鉅費繁難之邑侯
曰有志者事竟成耳乃設謀籌款紳民踴躍捐輸自秦仲
鳩工告竣於是冬之季經費共計肆萬餘緡夫以數百年
久廢之事而一朝興之所謂善後之圖思患預防者不在
此乎雖然善作者不必善成古今之通患也望後之宰此
邦者以陸侯之心爲心率都人士及時加修無令廢墜豈
非奕禩所
利賴哉

公署

縣治舊在城東北隅元延祐六年知縣李愍改建城西北
隅元末燬於兵明洪武三年縣丞周銘仍於舊治重建宣
德五年知縣張書重修成化六年知縣楊琇重修後廳三

間正德七年知縣張岳重修嘉靖二十年知縣魏廷修增
後堂

國朝康熙四年知縣楚有才重修十二年知縣江南璵重修同
治二年正月燬於賊尙未修復舊制大堂三間二堂三間
後廳五間後樓三間儀門三間庫房三間幕廳三間譙樓
三間架閣庫房吏戶禮房兵刑工房承發司房土地祠一
所獄神祠一所
學署舊在學宮左右因地勢低窪易至傾頽道光十年移
建西偏教諭訓導兩廨並列

典史署康熙四年建歷任官補葺咸豐七年典史高正邦
重修後因風雨剝落坍塌過半同治七年典史戚宗煊重
爲修建大門一間東西差房各二間大堂三間二堂三間
東西廊房四間客廳三間內宅五間耳房三間

察院在縣治東洪武三年縣丞周銘建今廢

府館在縣治西正德二年知縣成文建今廢

陰陽醫學在縣治東正德二年知縣成文建嘉靖二十一

年知縣魏廷改建於察院巷內今廢

僧會司在縣治東北隅興國寺內今廢

公所

萬壽宮舊在縣署之東廢闕已久至道光二十九年知縣侯紹堂勸諭紳民捐貲重建正殿三間東西朝房六間儀門一座東西廊房四間戲樓三間大門一座

旌善亭在縣治大門外左萬歷十八年知縣王學易重修今廢

申明亭在縣治大門外右萬歷十八年知縣王學易重修今廢

社學在察院西巷內街西今廢

養濟院在縣治東北隅康熙三十一年知縣許維樞重修
咸豐六年知縣張黼榮再修共房屋十餘間

留養局二一在縣治東偏乾隆年建歷任補葺土房七間
一在縣治西關嘉慶年重修土房十餘間

義塚一在西關外義民王雄捐地十畝一在城西南義民
支堯佐捐地五畝官買地五畝築垣立碣

倉廩

常平倉在縣署西二十間

社倉在縣署前五間同治二年爲賊所燬

城外義倉乾隆年由縣治擇適中之地相接二十里創建
六倉年深日久風雨摧殘多歸毀滅同治十年知縣彭美
詳查確實

趙橋村一倉早年傾塌兩間現僅存倉屋一間

審婆村一倉早年坍塌今仍舊基修復土房三間

圈頭村一倉早年傾塌二間現僅存半間

康家疇一倉傾塌無存

律家寨一倉傾塌無存

石海波一倉當年本未修成

壇廟

社稷壇在縣治西一里東西二丈五尺南北如之高三尺
樹木一圍繚以周垣

風雲雷雨山川壇在縣治東南一里東西二丈五尺南北
如之高三尺甃砌以磚

先農壇在縣治東南一里東西二丈一尺南北如之高二
尺一寸

厲壇在縣治北一里東西一丈八尺南北如之高二尺
文昌祠在學宮東偏道光九年重修

魁星閣在文昌祠前康熙丁巳重修知縣甯世璇記郡縣之有

學宮教化所由出人材所由育風氣之所由以昌隆而興起皆於是乎在今皇上崇尚文獻視學釋奠廣求學行博雅之士課吏之典非興行教化者弗得與國家之重學校如此其至也余不敏承乏茲土視事之初越三日謁至聖先師廟瞻禮几筵復步屨宮牆見舊奎星樓在學宮左相距數武欹榭頽甍崩簷墜瓦零落於荒煙淒雨之餘惄然心惻者久之夫學宮一邑之所以爲重也奎樓又學宮之所以爲助也逼而卑且圯而廢其如闔邑人文何於時邑之縉紳先生及博士弟子員咸揖余而言曰清興三十有二載而僅一發於戊戌再舉於壬子科名落落如晨星未能大振地靈人傑君其有意於斯乎余聞之唯唯按天文志壁爲圖書祕府奎爲天之武庫武庫所司似非文事載考文昌六星在北斗魁前爲六府一曰上將二曰次將三曰貴相四曰司祿司中五曰司命六曰司寇是其所司亦無一與文事相涉而世之所謂文明向有庇於土類者則必以文昌與奎星並稱不替魯頌曰思樂泮水在

泮獻馘母以文事武備固不宜分歟宋代五星聚於奎一時大儒輩出由是以觀文之必屬於奎而奎樓之大有助於學宮也豈待問之形象而後知哉乃鳩工飭材揆宜相勢建於東方取其賓賜而升華也峙於城門取其乘高而聳秀也盟心於二年前集事於人和之後上不費工下不累民向之所爲逼而卑者今且遠望而嵯峨矣向之所爲圯而廢者今且仰觀而巍煥矣由是而武邑之教化自此其益敦也武邑之人材自此其益盛也武邑之風氣由此然其益溥且良也修人事就地理應天時於以起衰而振弊毓厚而流光所忻慕焉是役也廣文鹿君桑君倡率之諸茂才李子楊子翟子韓子經理之邑之紳士父老協力贊成之余何力之有焉惟是經營告竣傑閣凌霄文光煥發余也樂觀其盛而邑人士之騰蛟起鳳應風雲而奮於天子之廷者將蒸蒸未有艾也於是乎援筆而爲之記

朱裴記

恒山之屬城曰武邑邑有閣曰奎星奎星之名史弗載相傳神掌爵祿科第能於虛漠中進退天下士以

故薦紳士大夫多有事焉按天官家言斗魁戴匡是爲文昌宮有司命司中司祿等星而二十八宿中奎爲封豕爲溝瀆爲天之府庫其文與後說不符稗史載宋徽宗朝羽士奏青詞言奎宿卽蘇軾事誕妄不可信要其大指顯中正警淫慝握禍福影響之柄以播敷大文斯其勗彪名教之功偉矣閣而禮之宜哉歲月浸久鶴巢蛇盤重以霜露漬蝕兵燹蕩析頽滅於育風怪兩者半矣今上御極十有七載余同學常君實尹茲土宣化飭紀祇祇威威民用太和迺周視城隍樓堞臺堠橋梁暨邑之庠序祠廟之秩祀典者毀者建隳者舉旣整旣飭觀閣之圯也喟然曰是非所以鼓髦士育德興行何剝落蕪穢一至此乎方今天子嚮用儒雅訪求卓犖宏博之士守士者欲以風動鼓吹黼黻勗皇休盛之治微是閣也曷以勸夫昔之人雖一邱一池一亭一榭苟可以寓耳目猶將咨詢廢址勒石誌勝俾弗壞桑門黃老之徒齋廬精舍無裨於吾道好事者猶捐糜金帛輪焉奐焉邑界趙冀之交多平原廣野桑麻棗栗無有深巖邃谷幽險詭怪園亭臺觀賞心縱目之勝惟茲閣巋然正中奮迅埤堞之上窮睇大牧仰接河漢闡

闐聚落歷歷井井而又足以迎神禱集天祉宏文化肅土
心於嘽曷其奈何弗新廼算程度庀車牛儲杞梓剡俸入
以餉役夫勿亟勿怠閱九月工告竣悅乎若奎璧之精焜
燿此一方也噫嘻常君可爲善牖斯民矣昔文翁之善俗
也式禮樂爲鑪錘陶鑄黔首其下化之講堂石像蜀人到
今侈美譚武邑肇自茲君子敦詩書小人寶忠信以歲時
詣閣下修飲射讀法之禮雅歌投壺蔚然斐然饒椒我邦
家以敬迓靈貺其疇不體君之誠而歌詠君之德只是役
也始於丁巳十月二十八日迄戊午五月十五日畢工廣
袤五丈四尺有奇高三丈六尺有奇視舊制有加旣集事
君馳書告余於長安余嘉君能厲
文雅以擾民也敘其事而識諸石

道光九年重修

鄉賢祠名宦祠俱在縣治東偏道光九年重修

昭忠祠在縣治東道光九年重修

節孝祠在縣治東同治五年建修

關帝廟在縣治東歷任官歲修至嘉慶二十四年知縣陳池養改建重修立有碑記又縣城外關帝廟七一在律家寨一在小庄村一在趙橋村一在史家庄一在崔鄉一在

石村一在李家店

俱各村
庄建修

城隍廟在縣治南明嘉靖壬寅重修知縣魏廷記

城隍廟遍
設於天下

郡縣凡新官履任則與神誓之朔望旦謁歲時厲祭春秋則配諸風雲雷雨山川神以共嚮胥制也嘉靖壬寅秋七月三巖子奉命來官齋宿而與神誓乃見殿廊綦蕪門堂傾圯四壁塌壞風雨之跡被神像面俶然嘆曰官非廉堂何以宣化神不安體何以揚靈夫亦有司之過也吾其圖之無何侯祀南壇壇之左有東嶽神廟周視其間規模壯